

19. mars 2023.

Framkvæmdverkefni á sviði umhverfis- og skipulagsmála.

Það verður að fagna styrkjum sem við fengum frá Minjastofnun. Vonandi tekst okkur vel að nýta þá í sumar.

Mig langar að koma með nokkrar hugmyndir um umhverfi okkar, sem tengjast báðum þeim húsum hér í þéttbýlinu sem fengu styrk, Faktorshúsinu og gömlu kirkjunni.

Gamla kirkjan:

Fara í hugmynda og hönnunarvinnu fyrir lóð og umhverfi kirkjunnar.

Að mínu mati þarf þetta ekki að vera flókið, léttar girðingar, kannski smá gróður og einhverjir stígar eða aðkomuleið. Þetta væri gaman að gera á sama tíma og kirkjan er kláruð að utan.

Við eigum líka gamla tréflaggstöng sem gaman væri að finna stað við kirkjuna.



Mynd úr myndasafnnonnuthorhalls, sett hér okkur til ánægjuauka og til skoðunar, mætti kannski styðjast við girðingu um garð Faktorshússins við hönnun girðingar við gömlu kirkjuna.

Svo langar mig til að lóðin við Faktorshúsið verði „kláruð“ og endurbætt í leiðinni. Ég vil taka það fram að ég var og er ekki hrifinn að núverandi lóð og hönnun hennar. Hún er hvorki í tengslum við húsið né sögu þess. En hægt er að gera margt til bóta.

Nokkrar athugasemdir til hugleiðingar:

Moldarflag eða beð í miðri hellulögn finnst mér út í hött þarna. Þetta rýrir möguleika á nýtingu lóðarinnar t.d. á Sjómannadaginn þegar þarna hafa verið viðburðir. Það hefði mátt hafa eitthvað færanlegt ef eitthvað þarf að vera þarna. Ef ekki er hægt að fjarlægja og setja steina í staðinn til að hafa planið óskert. Þá tel ég möguleika á að setja meiri mold og tyrfa og jafnvel setja einhverja stóra steina þar í eins og gert er á grassvæði utan við stéttina. Þá væri hægt að tylla sér þarna á steina í þurru veðri, eins og ég sá að fólk gerði á Sjómannadaginn á svæðinu fyrir utan stéttina. Það mættu kannski vera þarna bekkir eða annað til að tylla sér á, þá helst eitthvað sem gæti hafa verið þarna eða minni á þann tíma þegar húsið var uppá sitt besta. Kannski ættu kartöflur, rabbabari og hvönn bara best heima í moldarbeiðinu. Í beðið sem er á grasflötinni utan við stéttina kæmi vel út að vera með rabbabara frekar en að reyna að rækta þar einhverjar tráplöntur.

Ég er heldur ekki alveg sáttur við pallinn við húsið, einhvern veginn finnst mér hann ekki passa. En það getur verið að hann verði betri þegar hann verður full kláraður og húsið komið í notkun og pallurinn tengist því.

Lýsingu þarf að laga, að mínu mati. Staurar óþarflega margir og mætti fjarlægja einhverja t.d. í moldarflaginu. Kannski eru þeir ekki of margir en eitthvað finnst mér skrítið við þá. (fyrir utan að þeir eru nú ekki þeir flottustu á markaðinum) Lýsinguna á grjóthleðslunni meðfram lóðinni ætti að fjarlægja og er ekkert annað en óþarfa framkvæmd sem spillir hleðslunni. Ef að það þarf að lýsa þarna hleðsluna væri hægt að setja staura nær hleðslunni. Eins er rétt að skoða „ljósastaur“ á myndinni sem er hér með, það væri viðeigandi að hafa amk. einn svona staur þarna á svæðinu, hvort sem það er við Löngubúð eða Faktorshúsið eða jafnvel nálægt gömlu kirkjunni. Það er vel hægt að sjá fyrir sér 3 tréstaura með ljósum fyrir utan og meðfram grjóthleðslu og þá einn við enda á vegg við wc-in, sem einhverra hluta vegna er alltaf að hrynja úr. (Wc-in þarf náttúrulega að merkja á varanlegan og snyrtilagan hátt).

Það er athugandi að koma upp nokkrum „gömlum“ staurum og setja við gömlu húsin um bæinn, Faktorshúsið, Löngubúð, Geysi og gömlu kirkjuna. Gæti verið skemmtileg tenging á milli þessara húsa og jafnframt smá tenging við söguna.

Með bestu kveðjum,

Þór Vigfússon

Hrauni 1, Sólhól.